

Olschbrigger Kerb 2016



www.tus-olsbruecken.de



2 € fer die Juchend



1. Begrüßung

Ihr liebe Leit un Kupperstecher,
Ostännische un Schwerverbrecher,
Schiffschaukelbremser un -bremserinne,
Finanzberater mit Riesegewinne,
egal wer ner sin, an de Kerb spielt's kä Roll,
von Freidach bis Dienschdach simmer alle doll.

Die Olschbrigger Kerb wolle mer gleich begrüße,
indem ich denne Strauß do gieße.
Ich geh jetzt noch e Schritt no obbe,
mei Mundschenk reicht mer de gude Troppe.
Ich daaf dich uff de Name Günther
Un hoff du kummsch gut durch de Winter.

Solang ich de Reschd vum Wein verprobe,
darf sich unser Straußjuchend austobe.

[Straußjuchend kreischt die Kerb o]

De Wolle hat's heit leider net her geschafft,
awwer mer Geschtern noch e Uffnahm vum Kerwelied gemacht

„Die Olschbrigger Kerb is do“

2. Auf der Mauer auf der Lauer

Mir starte mit de erschte Posse,
de Protagonist is äner vun meine Altersgenosse.
Um sei Adoniskörper zu trainiere,
geht er als mit seinem Hund spaziere.

Er war grad erscht e paar Meter geloff,
do isser am Waldrand uff Wildschweine getroff.
Obwohl er sunscht net zimperlich is, hat er do die Flucht ergriff,
sei Hund war aus härterem Holz geschnitzt, un is em Wildschwein no geflitzt.
Beim Kammchen uff de Mauer hat unser Held dann gebangt,
während sei Hund sich mit dere Wildsau zankt.

Per Handy hat er e Notruf an sei Schwiejervadder abgesetzt,
der hat sei Flinte geschnappt un is richtung Waldhof gewetzt.
De Hund is mit leichte Blessure devun kumm,
die Wildsau han se nimmi gefunn.

Dass mer künftisch so e Wildsau a selbscht zur Strecke bringe kann,
müsst mer a de Jagdschein han.
Er hat net lang gefackelt un de Jagdschein gemacht,
un darf ab jetzt a selbscht uff die Jacht.

Die Musik spielt Dir – sei net sauer:
„Auf der Mauer, auf der Lauer“

3. Ja mir san mim Radl da

Vom Held aus meiner näggschd Geschichte
wurd in viele Kerweredde schun bericht.
Sei Fahrrad war a schun öfters involviert,
a des Johr is werrer was mit seinem Drohtesel bassiert.

Er war zu Gast beim Gesangsvereinsfescht,
un hat dort naderlich a ordentlich gezecht.
Uff em Hämweg isser mim Fahrrad abgeschmiert,
un hat irgendwie sei Daume in die Kett manövriert.

E harter Hund wie er halt is
Hat er 14 Daach die Zäh zamme gebiss.
Weil de Daume war schun schwarz,
is er dann doch mo zum Arzt.

Der hat ne direkt zur Unfallklinik geschickt,
dort wurd sei Daume dann geflickt.
Ich hoff die OP is gut gelung
Un wünsche gute Besserung!

Die Musik spielt Dir wie fast jedes Jahr:
„Ja, mir san mim Radl da“

4. Wegwerfgesellschaft

In unserer Wegwerfgesellschaft, dann un wann,
produziert mer soviel Müll, dass mer es selbscht net glabe kann.
A die Erzieherinne vum Olschbrigger Kinnnergarde waren schockiert,
wie unglaublich viel Müll so e Kinnnergarde produziert.

Es schlechte Gewisse hat se schun gepackt,
regelmäßig han se sich die Müllbeutel geschnappt
un se dann mit häm genomme,
um se zu schmeiße in die heimisch Tonne.

Doch selbscht dann warn die Tonne voll bis an de Rand,
bevor die Müllabfuhr war im Land.
Das hat dann gar kä Sinn gemacht,
un mer hat sich de Müll mo näher betracht.

Die Analyse hat dann bewiss:
E Nachbar hat sei Müll in die KiTa Tonne geschmiss.
Bei Nacht un Nebbel is der Wohl riwwer kumm,
vielleicht hat er's als grad mim Hämweg vum Fidibus verbunn.

Ich versteh awwer a die Motive vun dem Mann,
der muss jo spare wo er nur kann.
Um johrelange Verluschte an de Kerb auszugleiche,
muscht er halt sei Müll in fremde Tonne schmeiße.

Die Musik spielt jetzt voller Wonne
Es Tatort-Lied für dein Tonne

5. Aktuelles

A in de diesjährich Kerweredd gebt's e Stelle,
an der ich kurz aktuelles vermelle:

Zum schwimme un sauniere

Kammer nimmi in die Bahnhofsstroß spaziere.

Wer Wellness will erfahre, muss ab sofort ins Montemare.

Vielleicht kann mer **dort** jetzt iwwegungsweise,
nachts sei Müll in die Tonne schmeiße.

Am 14. Juni wurd verkündet,

das des TuS mit Schallodebach e Spielgemeinschaft gründet.

Die Schallodebacher un a die Neizugäng basse gut in unser Haufe,
die kenne net nur kicke, sondern a saufe.

Un mir han jetzt, werklisch wohr,

2 mo Kerb in änem Johr.

Äner vun de Spieler is gefahr zum Schallodebacher Kerwespiel,
redour muscht sei Beifahrer ans Steuer, er selbscht hatte zu viel.

Mim Bier kummt oft de Hunger a,

also sinn se no Lautre in de Burger King gefahr.

Uff em Parkplatz noch aus em Fenschter gebroch,
sinn se dort dann ingeloff.

Weil im Burger King die Stimmung war doof,
is de Markus dann grad ingeschloof.

Es spielt die Musik, ach wie wahr

„Die Schallodebacher Kerb war da“

6. Fisch

E mir recht gute bekanntes Paar
Is mit Ihrer Tochter no Hamburg gefahr.
So nah am Meer wollten die zwä die Gelegenheit nutze,
un jede Menge frischer Fisch verbutze.

Bei dem Plan han se awwer net bedacht,
dass ihr Tochter sich aus Fisch net viel macht.
No Rückkehr stellte sich dann raus,
die war'n in Hamburg im Münchner Hofbräuhaus!

Es näägschde mo kenne ner jo allä no Münche zische,
ich han gehört in de Isar gebbts a gude Fische!

Die Musik spielt jetzt – was e Graus
In Hamburg steht ein Hofbräuhaus

7. Mitfahrgelegenheit

Ich berichte jetzt vun änem Mann,
der is kürzlich uff e Beeridschung gang.
Dort hat er a noch Verwandschaft getroff,
der is no de Beisetzung bei ne geloff,
un hat gesat „Kumm ich fahr dich häm“,
des war em grad ganz ogenähm.

Owends isser dann zum CSG gewatet,
un hat e Kartpartie gestartet.
Äner vun de Kärtler war neigierisch geweset,
un hat ne a glei ausgepresst:
„Warum warschen noch so lang im Friedhof drin,
no demm alle annere häm gang sin?“

Dei Auto hat dort jo immer noch gestann,
do ware alle annere lang schun gang“
In dem Moment hat er realisiert,
dass sei Auto noch immer am Friedhof parkiert.
Sei Fahrer hat ne noch schä dro vorbei gelenkt,
awwer er hat sich do debei nix gedenkt.

Die Musik spielt bedächtisch
Von Bodo Wartke „Grässlich vergesslich“

8. Filmriss

Mir hatten beim TuS e Sommernachtsfete,
do war a so mancher Straußborsch zugege,
un hat schun fer die Kerb trainiert,
damit mer sich net an de Eichung blamiert.

Äns vun de Straußmäd wurd nachts um drei von de Hausdeerklingel geweckt,
zum uffstehe zu faul hat se ihr Handy gecheckt.

Kä Oruf un kä Nachricht erhal,
isse widder in de Schlof gefall.

Am näggschde Morje is ihr Vadder vum spatziere häm kum,
un hat an de Hausdeer e fremder Schlüssel gefunn.

E anner Straußmad hat denne dort nachts um drei falle geloss,
nodem se net uff kriecht hat es fremde Schloss.

Die hat ihr Nas zu tief ins Glas getaucht,
un desweh 3 Stunn häm zum Grubehof gebraucht.

Vun der ganz Aktion hat se nix mehr gewisst,
do isser wohl de Film geriss.

Es spielt dir die Musik

„Der Schlüssel zum Glück“

9. Wasser Marsch

Ah mei letschter Protagonist werr ich net namentlich nenne,
ich denk awwer, dass ner ne ganz gut kenne.

Der is grad beim Häusle baue,
un dut sich manches a selbscht zutraue.

Fer im Heizungskeller uff em Borrem die Dämmung ferddisch zu lehe,
wollt er e Ausgleichsbehälter selbscht abdrehe.

Daachs devor hat sei Heizungsbauer ne instruiert,
wie mer das macht, ohne dass was bassiert.

Erscht mol es Ventil zuggedreht,
dass er net glei im Wasser steht.

Dann de Behälter langsam abgeschraubt,
hat's em glatt die Stimmung versaut.

Wasser is em entgehe kumm,
er denkt das mim Ventil war falsch erumm.
Schnell de Druckbehälter widder dro gemacht,
das krieb mer hie, des wär doch gelacht.

Der Heizungsbauer hat sich bestimmt bei de Richtung verdu,
sunscht käm doch net Wasser raus im Nu.

Dem zeig ich mo wie das richtisch geht,
das Ventil werd komplett in die anner Richtung gedreht!

De Behälter widder langsam abgedreht,
bis uff ämo richtisch die Poscht abgeht.
Der Behälter macht e Ruck,
un Wasser kummt mit hohem Druck.

No kurzem Schock werd die Panik stark,
de Keller werd zum Wasserpark.
Des schein Ventil geht a net zu,
Er hat kä bassender Inbus dezu.

Mit änem zu kläne hat er's uffgeschafft,
un denne mit änem Schraubenzieher bassend gemacht.
Panisch macht er am Ventil erum,
dann isser zur Besinnung kumm.

Er hatte dann die rettende Idee,
de Ausgleichsbehälter äfach werrer an die Leitung zu drehe.
Also hat er sich das Ding geschnappt,
no e paar Sekunne hats sogar geklappt.

Es Wasser absedrehe hät iwwerischens nix gebrung,
des is aus em 1000 liter Puffer kumm.
Uff gut 100 Liter Wasser is die Dämmung fortgeschwumm,
denoh is großflächig de Nasssauger zum Insatz kumm.

Die Musik spielt dem Tausendsasser
„Wie ein Fisch im Wasser“

10. Verabschiedung

So ihr Leit, das wars fer heit,
feiern noch schä, awwer treibens net se weit.
Kaafen noch e Kerweredd als Souvenir,
die Straußjuchend trinkt vun dem Geld e paar Bier.

Un wenn ner a mei Kapp schä finne,
die gebt's se kaafe im Sportheim drinne.
Die kenne ner uff de Kopp eich setzte,
wanner als Zuschauer zu unsre Spiele wetze.

Jetzt gehen in's Sportheim, gebben aus eier Geld,
die Olschbrigger Kerb is die schännscht vun de Welt.

Autor und Kerweredner:
Benjamin da Silva Moreira